

**ხელშეკრულება
სახელმწიფო შესყიდვის შესახებ N38**

27 ივლისი 2018 წელი

ქალაქი ბათუმი

ერთის მხრივ შპს „სტადიონი“ (შემდგომში „შემსყიდველი“), წარმოდგენილი დირექტორის ზურაბ ჭურკვედიძის სახით და მეორეს მხრივ სს „ლიონ ავტო“ (შემდგომში „მიმწოდებელი“), წარმოდგენილი გენერალური დირექტორის გიორგი ფალიანის სახით, „სახელმწიფო შესყიდვების შესახებ“ საქართველოს კანონის და სს „ლიონ ავტო“-ს სატენდერო წინადადების საფუძველზე, შემსყიდველის მიერ ჩატარებული ელექტრონული ტენდერის (SPA180005919; კლასიფიკატორის (CPV) კოდი 34100000; 34110000) შედეგად დებენ წინამდებარე სახელმწიფო შესყიდვის შესახებ ხელშეკრულებას შემდეგზე:

1. გამოყენებული ტერმინების განმარტებები

ხელშეკრულებაში გამოყენებულ ტერმინებს აქვთ შემდეგი მნიშვნელობა:

- 1.1. „ხელშეკრულება სახელმწიფო შესყიდვის შესახებ“ (შემდგომ „ხელშეკრულება“) - შემსყიდველსა და მიმწოდებელს შორის დადებული წინამდებარე ხელშეკრულება მასზე თანდართული ყველა დოკუმენტითა და დამატებებით, რომელიც ხელმოწერილია მხარეთა მიერ;
- 1.2. „ხელშეკრულების საერთო ღირებულება“ - ხელშეკრულების ჯამური ღირებულება, რომელიც უნდა გადაიხადოს შემსყიდველმა მიმწოდებლის მიერ ხელშეკრულებით ნაკისრი ვალდებულებების სრული და ზედმიწევნით შესრულების სანაცვლოდ;
- 1.3. „შემსყიდველი“ - ორგანიზაცია, რომელიც ახორციელებს შესყიდვას;
- 1.4. „მიმწოდებელი“ - პირი, რომელიც ახორციელებს საქონლის მიწოდებას მოცემული ხელშეკრულების ფარგლებში;
- 1.5. „დღე“, „კვირა“, „თვე“ - კალენდარული დღე, კვირა, თვე;
- 1.6. „საქონელი“ - ხელშეკრულების მე-2 პუნქტით გათვალისწინებული ხელშეკრულების საგანი;
- 1.7. „ფასების ცხრილი“ - მიმწოდებლის მიერ ელექტრონული ტენდერის ფარგლებში წარმოდგენილი „დანართი #2 - ფასების ცხრილი“ რომელიც თან ერთვის ხელშეკრულებას და წარმოადგენს მის განუყოფელ ნაწილს;
- 1.8. „ტექნიკური მახასიათებლები“ - მიმწოდებლის მიერ ელექტრონული ტენდერის ფარგლებში წარმოდგენილი „დანართი #1 - ტექნიკური მახასიათებლები“, რომელიც თან ერთვის ხელშეკრულებას და წარმოადგენს მის განუყოფელ ნაწილს;
- 1.9. „ინფორმაცია საგარანტიო პირობების შესახებ“ - მიმწოდებლის მიერ ელექტრონული ტენდერის ფარგლებში წარმოდგენილი „ინფორმაცია საგარანტიო პირობების შესახებ“, რომელიც თან ერთვის ხელშეკრულებას და წარმოადგენს მის განუყოფელ ნაწილს.

2. ხელშეკრულების საგანი

2.1. მიმწოდებელი კისრულობს ვალდებულებას წინამდებარე ხელშეკრულებით და ხელშეკრულების დანართებით განსაზღვრული პირობების სრული დაცვით მიაწოდოს შემსყიდველს საქართველოს მთავრობის 2014 წლის 6 თებერვლის #121 დადგენილებით დამტკიცებული „სახელმწიფო ავტოპარკის გადანაწილების, კლასიფიკაციისა და სამსახურებრივი ავტომანქანის შესყიდვის წესი“-თ განსაზღვრული მე-3 კლასის 1 (ერთი) ერთეული მსუბუქი ავტომანქანა (CPV კოდი: 34100000) (შემდგომში - საქონელი), ხოლო შემსყიდველი კისრულობს ვალდებულებას მიიღოს მიწოდებული საქონელი და უზრუნველყოს ანგარიშსწორება წინამდებარე ხელშეკრულებით გათვალისწინებული პირობების შესაბამისად.

3. ხელშეკრულების ღირებულება

- 3.1. ხელშეკრულების საერთო ღირებულება შეადგენს 26 300 (ოცდაექვსი ათას სამასი) ლარს;
- 3.2. ხელშეკრულების ღირებულება მოიცავს საქართველოს კანონმდებლობით გათვალისწინებულ გადასახადებს/გადასახდელებს და ხელშეკრულებით გათვალისწინებული საქონლის სრულფასოვნად მიწოდებასთან დაკავშირებულ მიმწოდებლის ყველა ხარჯს - იმპორტირების, სახელმწიფო სანომრე ნიშნების, შემსყიდველის სახელზე სახელმწიფო რეგისტრაციის და მიწოდების მისამართზე ტრანსპორტირების ხარჯები;

3.3. შემსყიდველის მიერ სტანდარტული სახელმწიფო ნომრისგან განსხვავებული ნომრის მოთხოვნის შემთხვევაში, სტანდარტული ნომრის და განსხვავებული ნომრის ღირებულებებს შორის სხვაობას ანაზღაურებს შემსყიდველი.

4. ანგარიშსწორების ფორმა და პირობები

- 4.1. ანგარიშსწორება მოხდება უნაღდო ანგარიშსწორებით ლარში;
- 4.2. წინასწარი ანგარიშსწორება არ გამოიყენება;
- 4.3. მიმწოდებელთან ანგარიშსწორება განხორციელდება ერთჯერადად, მიმწოდებლის მიერ საქონლის მიწოდების, ხელშეკრულების მე-5 პუნქტით გათვალისწინებული დოკუმენტაციის შედგენის და სასაქონლო ზედნადების წარმოდგენიდან 10 (ათი) სამუშაო დღის ვადაში.

5. საქონლის მიღება-ჩაბარების წესი

- 5.1. საქონლის მიღება-ჩაბარებას ახორციელებენ სათანადოდ უფლებამოსილი პირები;
- 5.2. შემსყიდველის მხრიდან საქონლის მიღება-ჩაბარებაზე უფლებამოსილი წარმომადგენელი შემსყიდველი ორგანიზაციის ხელმძღვანელი - დირექტორი ზურაბ ჭურკვეიძე;
- 5.3. საქონლის მიღება განხორციელდება ერთჯერადად, ფაქტიურად მიწოდებული საქონლის ღირებულების მითითებით გაფორმებული მიღება-ჩაბარების აქტის წარმოდგენის გზით.

6. საქონლის მიწოდების ადგილი და ვადა

- 6.1. საქონლის მიწოდების ადგილია ქალაქი ბათუმში, მემედ აბაშიძის ქუჩა #16/18;
- 6.2. საქონლის მიწოდების ვადაა ხელშეკრულების გაფორმების თარიღიდან არაუგვიანეს 30 (ოცდაათი) კალენდარული დღე.

7. მხარეთა უფლება-მოვალეობანი

- 7.1. შემსყიდველს უფლება აქვს:
 - 7.1.1. შეამოწმოს მიწოდებული საქონლის შესაბამისობა წინამდებარე ხელშეკრულებით და ხელშეკრულების დანართებით განსაზღვრულ პირობებთან;
 - 7.1.2. არ მიიღოს საქონელი, თუ ის სრულად არ აკმაყოფილებს წინამდებარე ხელშეკრულებით და ხელშეკრულების დანართებით განსაზღვრულ პირობებს;
- 7.2. შემსყიდველი ვალდებულია:
 - 7.2.1. მოახდინოს ანგარიშსწორება მიმწოდებელთან ხელშეკრულებით გათვალისწინებული ვადებისა და პირობების შესაბამისად;
 - 7.2.2. უზრუნველყოს საქონლის მიღება ამ ხელშეკრულებით დადგენილი პირობების გათვალისწინებით;
- 7.3. მიმწოდებელს უფლება აქვს მოსთხოვოს შემსყიდველს მიწოდებული საქონლის ღირებულების ანაზღაურება ხელშეკრულებით გათვალისწინებული ვადებისა და პირობების გათვალისწინებით;
- 7.4. მიმწოდებელი ვალდებულია:
 - 7.4.1. დაიცვას ხელშეკრულებით გათვალისწინებული ყველა პირობა;
 - 7.4.2. შეასრულოს ხელშეკრულებით აღებული ვალდებულებები სათანადო ხარისხითა და მოცულობით იმ ვადაში, რომლებიც მითითებულია ხელშეკრულებაში.

8. ხელშეკრულებით ნაკისრი ვალდებულებების შესრულების კონტროლი

- 8.1. ხელშეკრულების შესრულების კონტროლს განახორციელებს შემსყიდველი ორგანიზაციის ხელმძღვანელი - დირექტორი ზურაბ ჭურკვეიძე;
- 8.2. კონტროლი გულისხმობს მიმწოდებლის მიერ ხელშეკრულების პირობების შესრულების მიმდინარეობის კონტროლს.

9. პირგასამტეხლო ხელშეკრულების პირობების შეუსრულებლობისათვის

- 9.1. ხელშეკრულების 6.2. ქვეპუნქტით განსაზღვრული ვალდებულების შეუსრულებლობის ან არაჯეროვანი შესრულების შემთხვევაში, შემსყიდველი მიმწოდებელს აკისრებს პირგასამტეხლოს ხელშეკრულების საერთო ღირებულების 0,02%-ის ოდენობით ყველა ვადაგადაცილებულ დღეზე;
- 9.2. ხელშეკრულების 4.3. ქვეპუნქტით განსაზღვრული ვალდებულების შეუსრულებლობის შემთხვევაში შემსყიდველს ეკისრება პირგასამტეხლო ასანაზღაურებელი თანხის 0,02%-ის ოდენობით ყველა ვადაგადაცილებულ დღეზე;

- 9.3. ხელშეკრულებით ნაკისრი ვალდებულებების შეუსრულებლობის გამო მიმწოდებელთან ხელშეკრულების შეწყვეტის შემთხვევაში მიმწოდებელს დაეკისრება პირგასამტეხლო ხელშეკრულების საერთო ღირებულების 10%-ის ოდენობით;
- 9.4. შემსყიდველი დარიცხული პირგასამტეხლოს თანხის დაკავებას შესაბამისი წერილობითი შეტყობინების საფუძველზე ახორციელებს მიმწოდებელზე ასანაზღაურებელი თანხიდან;
- 9.5. იმ შემთხვევაში, თუ დარიცხული პირგასამტეხლოს თანხა აღემატება მიმწოდებელზე ასანაზღაურებელ თანხას, მიმწოდებელი ვალდებულია პირგასამტეხლოს თანხა ჩარიცხოს შეტყობინებაში მითითებულ საბანკო ანგარიშზე შეტყობინების მიღებიდან 10 (ათი) სამუშაო დღის განმავლობაში;
- 9.6. პირგასამტეხლოს გადახდა არ ათავისუფლებს მიმწოდებელს ხელშეკრულებით განსაზღვრული ძირითადი ვალდებულებების შესრულებისაგან.

10. ხელშეკრულებაში ცვლილებების შეტანა

- 10.1. არავითარი გადახრა ან ცვლილება ხელშეკრულების პირობებში არ დაიშვება ორივე მხარის მიერ ხელმოწერილი წერილობითი შესწორებების გარდა;
- 10.2. ხელშეკრულების პირობების ნებისმიერი ცვლილება უნდა გაფორმდეს ხელშეკრულების დანართის სახით, რომელიც ჩაითვლება ხელშეკრულების განუყოფელ ნაწილად;
- 10.3. ხელშეკრულების პირობების, მათ შორის ფასის შეცვლა დაუშვებელია, თუ ამ ცვლილების შედეგად იზრდება ხელშეკრულების ღირებულება ან უარესდება ხელშეკრულების პირობები შემსყიდველისათვის, გარდა სახელმწიფო შესყიდვების მარეგულირებელი კანონმდებლობით გათვალისწინებული შემთხვევებისა;
- 10.4. თუ რაიმე წინასწარ გაუთვალისწინებელი მიზეზების გამო წარმოიშობა ხელშეკრულების პირობების შეცვლის აუცილებლობა, ცვლილებების შეტანის ინიციატორი ვალდებულია წერილობით შეატყობინოს მეორე მხარეს შესაბამისი ინფორმაცია.

11. ხელშეკრულების შეწყვეტა

- 11.1. შემსყიდველს შეუძლია მთლიანად ან ნაწილობრივ შეწყვიტოს ხელშეკრულება, მიმწოდებლისათვის წერილობითი შეტყობინების შემდეგ:
- ა) თუ შემსყიდველი დარწმუნდება, რომ მიმწოდებელს ხელშეკრულებით გათვალისწინებულ ან შემსყიდველის მიერ გაგრძელებულ ვადებში არ შეუძლია შეასრულოს ხელშეკრულებით ნაკისრი ვალდებულებები;
- ბ) თუ ხელშეკრულების 9.1. ქვეპუნქტის საფუძველზე დაკისრებული პირგასამტეხლოს ჯამური თანხა გადააჭარბებს ხელშეკრულების საერთო ღირებულების 10%-ს;
- გ) თუ შემსყიდველისათვის ცნობილი გახდა, რომ მისგან დამოუკიდებელი მიზეზების გამო იგი ვერ უზრუნველყოფს ხელშეკრულებით ნაკისრი ვალდებულებების შესრულებას;
- დ) საქართველოს კანონმდებლობით გათვალისწინებულ სხვა შემთხვევებში;
- 11.2. შემსყიდველი ვალდებულია არანაკლებ 10 (ათი) დღით ადრე წერილობით აცნობოს მიმწოდებელს 11.1. პუნქტით გათვალისწინებული გადაწყვეტილების მიღების განზრახვის თაობაზე;
- 11.3. ხელშეკრულების ერთ-ერთი მხარის მიერ ხელშეკრულების პირობების შეუსრულებლობის შემთხვევაში, მეორე მხარე უფლებამოსილია ცალმხრივად შეწყვიტოს ხელშეკრულება, მოქმედი კანონმდებლობით დადგენილი წესითა და პირობებით;
- 11.4. ხელშეკრულება შეიძლება შეწყდეს მხარეთა ინიციატივით, ურთიერთშეთანხმების საფუძველზე.

12. ხარისხი და გარანტია

- 12.1. მიმწოდებელი კისრულობს პასუხისმგებლობას, რომ მიწოდებული საქონელი სრულად შეესაბამება წინამდებარე ხელშეკრულებით და ხელშეკრულების დანართებით განსაზღვრულ პირობებს, არის ახალი და ექსპლუატაციაში არმყოფი, უფლებრივად და ნივთობრივად უნაკლო და იღებს პასუხისმგებლობას მისი წარმოშობის კანონიერებაზე;
- 12.2. ექსპლუატაციის ნორმების დაცვის პირობებში, მიმწოდებელი კისრულობს საგარანტიო პირობების შესახებ ინფორმაციით განსაზღვრულ საგარანტიო ვალდებულებებს;
- 12.3. საგარანტიო ვადაში საქონელზე გამოვლენილი ქარხნული წუნის/ხარვეზის/დეფექტის/ გაუმართაობის შემთხვევაში, მიმწოდებელი ვალდებულია, საკუთარი ხარჯებით, შემსყიდველის მიერ წერილობითი მოთხოვნიდან არაუმეტეს 10 (ათი) სამუშაო დღის ვადაში, შეაკეთოს ან ახლით შეცვალოს წუნის/დეფექტის/ხარვეზის მქონე საქონელი.

12.4. ქარხნული წუნის/ხარვეზის/დეფექტის/გაუმართაობის შემთხვევაში საქონლის ტრანსპორტირება უნდა უზრუნველყოს მიმწოდებელმა. აღნიშნული ვადა, მხარეთა შეთანხმებით, შესაძლებელია განისაზღვროს არაუმეტეს 45 კალენდარული დღით, თუ, საჭირო გახდა დეფიციტური ნაწილ(ებ)ის (რომელიც მოცემული მომენტისთვის შეუძლებელია მოძიებულ იქნას საქართველოს ტერიტორიაზე) შეცვლა ახლით.

13. დაუძლეველი ძალა

13.1. მხარეები თავისუფლდებიან ხელშეკრულებით განსაზღვრული ვალდებულებების შეუსრულებლობით გამოწვეული პასუხისმგებლობისაგან, თუ აღნიშნული გამოწვეულია დაუძლეველი ძალის ზეგავლენით;

13.2. ამ პუნქტის მიზნებისათვის „დაუძლეველი ძალა“ ნიშნავს მხარეებისათვის გადაულახავ და მათი კონტროლისაგან დამოუკიდებელ გარემოებებს, რომლებიც არ არიან დაკავშირებული შემსყიდველისა ან/და მიმწოდებლის შეცდომებსა და დაუდევრობასთან და რომლებსაც გააჩნიათ წინასწარ გაუთვალისწინებელი ხასიათი;

13.3. თუ მხარე დაუძლეველი ძალის გამო ვერ ასრულებს ვალდებულებებს, მან ამის შესახებ დაუყოვნებლივ, არაუგვიანეს ორი სამუშაო დღის ვადაში წერილობით უნდა აცნობოს მეორე მხარეს აღნიშნული გარემოების დადგომის შესახებ;

13.4. 13.3. პუნქტით განსაზღვრული ვალდებულების შეუსრულებლობის შემთხვევაში, მხარე არ გათავისუფლდება ხელშეკრულებით ნაკისრი ვალდებულებებისაგან;

13.5. მხარეთა ვალდებულებები და პასუხისმგებლობა განახლდება დაუძლეველი ძალის მოქმედების დასრულებისთანავე;

13.6. თუ სახელშეკრულებო ვალდებულებების მთლიანი ან ნაწილობრივი შეუსრულებლობის პირობები გაგრძელდა ერთ თვეზე მეტ ხანს, მხარეებს უფლება აქვთ შეწყვიტონ ხელშეკრულების მოქმედება, კომპენსაციის უფლების მოთხოვნის გარეშე.

14. სადაო საკითხების გადაწყვეტა

14.1. შემსყიდველმა და მიმწოდებელმა ყველა ღონე უნდა იხმარონ, რათა პირდაპირი არაოფიციალური მოლაპარაკებების პროცესში შეთანხმებით მოაგვარონ ყველა უთანხმოება და დავა, წარმოქმნილი მათ შორის ხელშეკრულების ან მასთან დაკავშირებული სხვა კომპონენტის ირგვლივ;

14.2. შეთანხმების მიუღწევლობის შემთხვევაში, ნებისმიერ მხარეს დავის გადაწყვეტის მიზნით შეუძლია საქართველოს კანონმდებლობის შესაბამისად მიმართოს სასამართლოს.

15. სხვა პირობები

15.1. მხარეები აუნაზღაურებენ ერთმანეთს მიყენებულ ზარალს საქართველოს კანონმდებლობის შესაბამისად;

15.2. არც ერთ მხარეს არა აქვს უფლება გადასცეს მესამე პირს თავისი უფლებები და მოვალეობები, მეორე მხარის წერილობითი თანხმობის გარეშე.

15.3. მესამე პირთან ურთიერთობაში მხარეები მოქმედებენ თავიანთი სახელით, ხარჯებითა და რისკით;

15.4. ნებისმიერი შეტყობინება, რომელსაც ერთი მხარე, ხელშეკრულების შესაბამისად, უგზავნის მეორე მხარეს, გაიგზავნება წერილის, ელექტრონული წერილის ან ფაქსის სახით, ორიგინალის შემდგომი წარდგენით, ხელშეკრულებაში მითითებული მეორე მხარის მისამართზე. შეტყობინება ძალაში შედის ადრესატის მიერ მისი მიღების დღეს ან შეტყობინების ძალაში შესვლის დადგენილ დღეს, იმის მიხედვით, თუ ამ თარიღებიდან რომელი უფრო გვიან დგება;

15.5. ხელშეკრულება დადებულია საქართველოს კანონმდებლობის შესაბამისად და ინტერპრეტირებული იქნება საქართველოს კანონმდებლობის მიხედვით;

15.6. ხელშეკრულება და მასთან დაკავშირებული მთელი წერილობითი მოლაპარაკებები და სხვა დოკუმენტაცია, რომელიც გაიცვლება მხარეთა შორის შესრულებდა ქართულ ენაზე;

15.7. უცხოურენოვან დოკუმენტსა და მის ქართულ ენაზე შესრულებულ თარგმანს შორის პრიორიტეტი ენიჭება ქართულ ენაზე შესრულებულ თარგმანს;

15.8. ხელშეკრულება შედგენილია ორი თანაბარი იურიდიული ძალის მქონე ეგზემპლარად, რომლებიც ინახება ხელშეკრულების მხარეებთან.

16. ხელშეკრულების მოქმედების ვადა

- 16.1. ხელშეკრულება ძალაში შედის ხელშეკრულების თავში მითითებული თარიღიდან და მოქმედებს 2018 წლის 30 სექტემბრამდე.
- 16.2. ხელშეკრულებით ნაკისრი ვალდებულებების შესრულების მოთხოვნის უფლება ძალაში რჩება ხელშეკრულების მოქმედების ვადის გასვლის შემდეგაც.

17. მხარეთა რეკვიზიტები

შემსყიდველი	მიმწოდებელი
შპს „სტადიონი“	სს „ლიონ ავტო“
იურიდიული მისამართი – ქ.ბათუმი, მ.კომახიძის ქუჩა #119	იურიდიული მისამართი – ქ.თბილისი, ბესიკის ქუჩა #4-ის მიმდებარედ, (ნაკვეთი 46/10), ბ.65
ფაქტიური მისამართი – ქ.ბათუმი, მ.აბაშიძის ქუჩა #16/18	ფაქტიური მისამართი – ქ.თბილისი, ჯორჯ ბალანჩინის ქუჩა #34
ელფოსტა – info@stadium.ge	ელფოსტა – lasha.shikhashvili@peugeotauto.ge
ბანკის დასახელება – სს „საქართველოს ბანკი“	ბანკის დასახელება – სს „საქართველოს ბანკი“
ბანკის კოდი – BAGAGE22	ბანკის კოდი – BAGAGE22
ა/ნ – GE15BG0000000100814289	ა/ნ – GE62BG00000000916135400
საიდენტიფიკაციო კოდი – 445409415	საიდენტიფიკაციო კოდი – 404488979

ზურაბ ჭურკვეიძე

გიორგი ფალიანი

შპს „სტადიონი“-ს
დირექტორი



შპს „ლიონ ავტო“-ს
გენერალური დირექტორი

